

## **Makitu ki Pol ndangi adi Pilemon Ta ki dɔ makitu'ti ki Pol ndangi adi Pilemon**

Makitu kin in makitu ki Pol ndangi adi Pilemon ki ɔjido'a inbe ta dangi. Pilemon in njekunme, in ngatɔgi me be'ti. Onejim in bɛr lɛ Pilemon ɔ te kɛy lɛ be'ne anyi. Dɔkagilo madi ingɛi nan ki Pol. Kitakul Pol ɔ Onejim un me'ne adi Kirisiti. Ngɔsine Pol ad'a tɛl aw rɔ Pilemon'ti gogi ningɛ el Pilemon kadi uwɛ ki rɔ'ne'ti um oo'ɛ to bɛr par el nga, nan oo'ɛ to ngonkon me Kirisiti'ti.

Kon ta'gi ki me'ti: Kandi me ta'ti 1-3. Oyo ki Pol ra Luwɛ ɔjido kunme lɛ Pilemon 4-7. Pol naji Onejim 8-22. Dɔboy ta 23-25.

### *Kuwɛ ji nan*

<sup>1</sup> M'in Pol ki m'in dangay'ti tado Poyta ki maji lɛ Jeju Kirisiti, nan'ti ki ngannkon'gi Timote, j'ulɛ ki makitu kin j'uwɛ'n ji'i in Pilemon. In njendigi ki ngayn ta in madikulɛ'je tɔ\*.

<sup>2</sup> J'uwɛ ji konnann'je Apiya, taa Arsipi ki in madi rɔ lɛ'je tado lɛ Kirisiti kin tɔ†. Ningɛ j'uwɛ ji Njekawnan'gi ki sii me kɛy'ti lɛ'i in Pilemon tɔ.

<sup>3</sup> Kadi memaji ki kisimaji lɛ Baw'je Luwɛ in ki Burɛbe lɛ'je Jeju Kirisiti in sese.

### *Ndigi nan ki kunme lɛ Pilemon*

---

\* **1:1 1.1** 13, 22, 23   † **1:2 1.2** Kol 4.17

4 M'ra oyo Luwə lə'm tado dəkagilo'gi pəti ki m'nji m'el si'ə ta ningə, me'm olo do'i'ti in Pilemon.

5 Tado m'oo poy'i kadi in ndigi ngann'gi lə Luwə pəti. Kunme ningə, adi me'i Burəbe Jeju Kirisiti to.

6 M'in dəji kadi kində rə nan'ti lə'i se'je do kunme'ti te ki kandi nya ngayn. Kunme kin a toji kadi de'gi gəri kulə'gi pəti ki maji ki j'asi ra ki takul kində rə nan'ti lə'je ki Jeju Kirisiti.

7 Ngonnkon'm, m'ingə rənel ki mesol ngayn tado ndigi lə'i, tado ngann'gi lə Luwə ingəi mesol ki gorow ndigi lə'i kin.

### *Nya dəji lə Pol tado Onejim*

8 In be ə, re m'ingə togi me to Kirisiti'ti kadi m'oj'i nya ki maji kadi ra kaa,

9 m'ge kadi, ki takul ndiginan ki to dann'je'ti, m'in dəji nya to dəji yo. Toki oo'n, m'in Pol m'bugə, ta dəkagilo'ti kin m'in me kəy dangay'ti tado lə Jeju Kirisiti,

10 m'dəj'i nya kare tado ngonn'm ki me Kirisiti'ti Onejim. Ngəsine, m'in təl baw'a kigo ta'ti lə Jeju me kəy dangay'ti ne‡.

11 Kete in de ki nda'a goto takum'i'ti, ningə ngəsine təl de ki nda'a to tado lə'je joo pəti.

12 M'təl m'ulə ki rə'i'ti gogi, in ki in de darə'm.

13 M'ge ngayn kadi m'in ngəm'ə rə'm'ti ne kadi ra kulə adi'm tor'i'ti, dəkagilo'ti ki m'in'n dangay'ti tado Poyta ki maji lə Jeju.

---

‡ 1:10 1.10 Kol 4.9

14 Ningə m'ndigi ra nya madi ki kanji ko yan'i, el. Mərta lə'm in kadi ra maji lə'i in kigo me ndigi'ti lə'i inbe, um in ki tōgi ki kində dō'ti el.

15 Dəmajı ə, Onejim gangi nan sə'i dəkagilo ki nden be, kadi re ingə gogi ningə, isi sə'i bitı.

16 A ingə gogi to bər el nga. A oo'ə to de ki gat'a in ngayn utə bər. A oo'ə to ngonkon'i ki nje ndigi lə'i me Kirisiti'ti. M'ndig'ə ngayn, nan m'in gər kadi ndigi ki in a ndig'ə a utə yan'm bay, kigo daro'ti, eke kigo row'ti lə Luwə.

17 In be ə, re oo'm to madikulə'i ningə, uwə ro'i'ti toki in m'inbe ə uwə'm ro'i'ti be.

18 Re ra sə'i nya madi ki low'ə'ti el, eke aw ki bəngi lə'i dō'a'ti kaa, ində dō'm'ti.

19 M'in Pol inbe ə m'in ndangi ta kin ki ji'm. M'a m'ugə'i bəngi kin. Maji kadi in gər toki m'aw ki bəngi dō'i'ti, adi in daro'i inbe.

20 Oyo Ngonkon'm, m'dəj'i kadi ra kulə kin adi'm me tō Burəbe'ti. In ra adi me'm səl me tō Kirisiti'ti.

21 Me'm olo dō təl rō go ta'ti lə'i dəkagilo'ti ki m'nji m'ndangi'n makitu kin mad'i. Ningə m'gər kadi a ra toki m'dəj'i. Be el ə, a ra utə in ki m'dəj'i kin bay.

22 Ningə m'dəj'i kadi ində dō kəy madi dana adi'm. Tado m'ində me'm dō'ti kadi, takul k'el ki isi elita ki Luwə tado lə'm kin, a ra adi nje konbe'gi a inyəi m'in ta adi'se.

*Kuwə ji nan ki dəboy'ti*

23 Epirasi uwə ji'se. In sə'm nan'ti kəy dangay'ti ne tado lə Jeju Kirisiti'š.

<sup>24</sup> Madi kulə'm'gi, Marki\* in ki Arisitarki†, ta Dəmasi‡ in ki Luki§ uwəi ji'se tɔ.

<sup>25</sup> Kadi maji lə Burəbe Jeju Kirisiti in nan'ti sese.

---

\* **1:24 1.24** 2Ti 4.11 † **1:24 1.24** KNK 19.29, 27.2; Kol 4.10

‡ **1:24 1.24** Kol 4.14; 2Ti 4.10 § **1:24 1.24** Kol 4.14

**Ta lə Luwə Kunmindɪ kɪ Sigi**  
**New Testament in Gor**

copyright © 2014 Wycliffe Bible Translators, Inc.

Language: Gor

Contributor: Wycliffe Bible Translators, Inc.

All rights reserved.

2025-05-03

---

PDF generated using Haiola and XeLaTeX on 2 May 2025 from source files  
dated 3 May 2025

2c67456e-bce1-5ef4-9c95-47d2d9335aa4